

Lëtzebuerg, den 26. Juni 2023

Här Fernand ETGEN
Chamberspräsident
LËTZEBUERG



DEMOKRATESCH
PARTEI

Chambre des Députés
Groupe Parlementaire

Här President,

Esou ewéi den Artikel 80 vum Chambersreglement et virgesäit,
biede mir Iech, dës parlamentaresch Fro un den Här Minister fir
Landwirtschaft, Wäibau a ländlech Entwécklung weiderzeleeden:

*„Den däitsche Raiffeiserverband huet seng Prognos fir d'Recolte vu
Kären erofgesat, an zwar ëm 1,2 Milliounen op 42 Milliounen
Tonnen. Och beim Raps géif d'Recolte manner staark ausfalen.
Effektiv, zanter Mëtt Mee huet et quasi néierens méi gereent; dat
féiert zu Dréchestress an dréckt d'Ertrag erof. An der EU leide
momentan quasi all Länner ënner der Dréchent, besonnesch awer
Polen, déi baltesch Länner a Skandinavien.*

*An deem Kontext wollte mer den Här Landwirtschaftsminister
folgendes froen:*

- Wéi schätzt den Här Minister d'Lag hei zu Lëtzebuerg de
Moment an? Wat fir eng Kulture si manner resistant a
besonnesch vun der Dréchent betraff?*
- Bei wat fir enge Kulture riskéiert et zu irreparable Schied ze
kommen?“*

Mat déiwem Respekt,

André Bauler
Deputéierten

Gusty Graas
Deputéierten

9, rue du St. Esprit
B.P. 510
L-2015 Luxembourg

Tel. : 22 41 84 1
Fax : 47 10 07

dp@dp.lu
www.dp.lu



LE GOUVERNEMENT
DU GRAND-DUCHÉ DE LUXEMBOURG
Ministère de l'Agriculture, de la Viticulture
et du Développement rural

Äntwert vum Minister fir Landwirtschaft, Wäibau a ländlech Entwécklung op d'parlamentaresch Fro n°8106 vun den éierbaren Deputéierten André Bauler an Gusty Graas

Wéi schätzt den Här Minister d'Lag hei zu Lëtzebuerg de Moment an? Wat fir eng Kulturen si manner resistent a besonnesch vun der Dréchent betraff?

Allgemeng kann een zur Zäit Folgendes feststellen:

Op eisen déifgrënnege Biedem laanscht d'Musel ginn et bis well keng Problemer. Souguer Riewen, déi e puer Joer hannertenee mat Dréchestress geplot sinn, iwwerliewen dat ënner der Bedingung, datt den Ertrag reduzéiert gëtt. Jonk Wéngerte par konter musse bewässert ginn, soss iwwerliewen d'Planzen dat net.

Och bei Uebst a Geméis kënn de Produzent meeschtens leider net derlaanscht, aktiv bei Zäite vu längerer Dréchent ze netzen. Beim Uebst sinn natierlech och ganz besonnesch déi jonk Beem betraff. Mee an allen intensiven Uebstanlagen ass eng Bewässerung wichteg fir eng gutt Recolte ofzesécheren. Bei ville Geméisorte leiden d'Qualitéit an de Rendement direkt no och enger kuerzer Dréchent. Dëst wëssen d' Betriber, déi am Secteur tätég sinn, an hunn oder sinn amgaang sech och deementspreechend anzeriichten. Hei bleift awer d'Problematik, dass Waasser keng onerschöpflech Ressource ass, zu där den Zougang illimitéiert ass. Op dësem Themefeld schaffe momentan de Landwirtschaftsministere an den Ëmweltministere zesumme mam Secteur fir Léisungen ze fannen.

An der Landwirtschaft huet d'Recolte am Kärebau ongeféier eng Woch méi fréi ugefaange wéi am Duerchschnitt vun de Joren. Vum Secteur kennt d'Reckmeldung, datt d'Recolte an der Wantergeescht méi schlecht ausfällt wéi am Ufank geduecht, de Kär ass kleng, Stréi gëtt et awer vill. D'Wanterkulturen hunn am meeschte vum Waasser am Fréijoer konnte profitéieren.

Dëst Joer hu virun allem d'Summerkären ënnert der Dréchent gelidden. Duerch dat naasst Fréijoer konnten dës Kulturen eréischt méi spët ausgeséint ginn, an do huet virun allem am Mee an am Juni Reen gefeelt. Am Gréngland an am Feldfudderbau konnt eng gutt éischt Coupe gemaach ginn, et ass awer net vill un Ertrag nokomm. Wisen a Weede sinn nach zum Deel gréng, den Zouwuess ass awer quasi op null.

Eng Pressekonferenz vum Landwirtschaftsminister mam Secteur, wou en genaue "Bilan des récoltes" gemaach gëtt, ass vir den 13te September festgesat. Et ass nach wierklech ze fréi fir eng definitiv Ausso zum Karschnatz 2023 ze maachen.

Bei wat fir enge Kulture riskéiert et zu irreparabele Schied ze kommen?

Zu irreparabele Schied ass et an de Summerkäre komm. De Mais huet och mat der Dréchent ze kämpfen, an et weess een nach guer net ewéi dat ausgeet, mee déi kleng Reeschauere vun de leschte Wochen hëllefe ganz vill. Regional a souguer lokal ginn en ganz grouss Differenzen an de Kulturen, vu schlecht bis ganz gutt.

Lëtzebuerg, de 14. Juli 2023

De Minister fir Landwirtschaft, Wäibau a ländlech Entwécklung,

(s.) Claude HAAGEN